



Inatsisartuni ilaasortaq Aqqaluaq Biilmann Egede, Inuit Ataqtigiit

## **Kiffartuussinermut isumaqatigiissutit pillugit § 37 naapertorlugu apeqquteqaammut 2018-233-mut akissut**

13-09-2018  
Suliaq nr.: 2018 - 17708  
Id nr. 33182201

Asasara Aqqaluaq Biilmann Egede

Inatsisartut suleriaasianni § 37 naapertorlugu apeqquteqaatinut nassiussannut qujanaq. Apeqqutit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
Fax: (+299) 34 63 56  
www.naalakkersuisut.gl

### **Apeqqut 1: Mittarfiit sanaartorneqarnissaat sioqqullugu ullumikkutut angallannerut aqqiissuunneqarsimanera Naalakkersuisuisut naammagisimaarpaat?**

*Akissut:* Angallannerit ilusaat atuuttut ukiorparujussuarni siunertamut iluaqutaasimasut Naalakkersuisut isumaqarput. Angallannerit ilusaat maanna atuuttut atuutsiinnarniarlugit aningaasat aningaasaleeqqinnermut atugassat amerlasuut pisariaqartinneqarmata, angallannerit ilusaannut nutaamut, ilaasut amerlanerusut apuuffissaminnut toqqaannartumik apuuffigisinnaasaannut aningaasaliinissamut piffissanngortoq Naalakkersuisut isumaqarput.

### **Apeqqut 2: Naalakkersuisut kiffartuussinermut isumaqatigiissummi Disko Line-ip pituttorfineqarsimanera naammagisimaarpaat?**

*Akissut:* Aap, Naalakkersuisut isumaqatigiissummi piumasaqaataasut naammagisimaarpaat, taakkunungalu isumaqatigiissutit piffissap isumaqatigiissuteqarfiusup ingerlanerani illuatungeriinnit atorunnaarsinneqarsinnaannginnera ilaavoq.

Tassunga tunngatillugu oqaatigineqassaaq, isumaqatigiissut atorunnaarsinneqarsinnaasimagaluarpat, tamanna tapiissutissanik amerlanerungaatsiartunik pisariaqartitsiviusussaagaluartoq ilimanaateqarluinnarmat, tassani sullissisut isumaqatigiissutit naannginnerini Namminersorlutik Oqartussat isumaqatigiissutinik atorunnaarsitsisinnaanerat ilanngullugu naatsorsortussaasimassagaluarpassuk.

### **Apeqqut 3: Angallannermut Naalakkersuisup akisussaasutut pingaartumik nunatta kujataani Disko bugt-imilu kiffartuussinermut isumaqatigiissut atorunnaarsinneqartariaqanngitsutut isumaqarfigai?**

*Akissut:* Qeqertarsuup Tunuani aamma Kalaallit Nunaata kujataani kiffartuussinermut isumaqatigiissutiniittuni pisussaaffinnik sumiginnaasoqarsimangimmat, Naalakkersuisunit kiffartuussinermut isumaqatigiissutinik atorunnaarsitsinissaq pisariaqartutut isumaqarfigineqanngilaq.

**Apeqquut 4: Kiffartuussinermi isumaqatigiissummi nunatta kujataani Nanortalimmut angallassinerup pitsaassusaa Naalakkersuisut isumaqatigaat?**

*Akissut:* Naalakkersuisut angallannermi sullissineq qanimut malinnaaffigaat – taakkunungalu Nanortalip angallannikkut sullinneqarnera ilaavoq, ilaatigut pisinnaasat misissuiffigineqarsimallutik. Sullissisup angallannermi sullissineq isumaqatigiissutaasoq naammassisimagaa, aammalu sullissisoq pingaartumik aallarnisarnermi unamilligassat paasineqartut naammassiniarlugit ilungersuuteqarsimasoq inerniliissutigineqarpoq.

**Apeqquut 5: Qeqertarsuarmut aamma Qaqortumi Narsamilu kiffartuussinermi isumaqatigiissummi pituttuisumik angallasseriaaseq Angallannermut Naalakkersuisup Naalakkersuisoqataasalu ajunngitsutut isigalugu allannortinniannigilaat?**

*Akissut:* Naalakkersuisut angallannermi sullissineq aammalu ornigassani tamani isumaqatigiissutit tunngavilugit pisussaaffiit naammassineqartarnersut qanimut malinnaaffigaat – taakkunungalu Qeqertarsuup angallannikkut sullinneqarnera ilaavoq. 2017-imili Qeqertarsuarmi angallannikkut pissutsit pitsannguiffiginarlugit piffissap imaatigut angalaffiusup ilaani Sarfaq Ittuk atorlugu Qeqertarsuup sullinneqarnissaa pillugu Arctic Umiaq Line isumaqatigiissuteqarfigineqarpoq, Isumaqatigiissut taanna 2018-imi ingerlateqqinneqarpoq.

Ataatsimut isigalugu sumiiffinni kiffartuussinermut isumaqatigiissuteqarfiusuni tamani akulikissuseq, bilitsit akii, kiffartuussineq, pitsaassuseq atorullu aningaasaqarnermut sinaakkusiussat iluanni nuna tamakkerlugu ataatsimut aaqqiissutissanik nassaarniarnerup inerneraat.

Kiffartuussineq pitsaanerussappat tamanna aningaasanik amerlanerusunik pisariaqartitsiviussaaq. Inatsisartut angallannermi kiffartuussinermut aningaasaqarnermut sinaakkutissanik aalajangersaasarput.

**Apeqquut 6: Kiffartuussinermik isumaqatigiissutit atorunnaarsinneqassanngippata tunngavilersuutit qanoq ittut Angallannermut Naalakkersuisup tunngavilersuutigai?**

*Akissut:* Kiffartuussinermut isumaqatigiissutini pisussaaffiit sumiginarneqarsimatinnagit, kiffartuussinermut isumaqatigiissutit piffissami isumaqatigiissuteqarfiusumi atorunnaarsinneqarsinnaanngillat. Apeqquut 3-mut akissut takuuk.

**Apeqquut 7: Kiffartuussinissamik isumaqatigiissutit nutaassat isumaqatiginninniutigineqaqqinnissaat, imaluunniit suliariumannittussarsiuusseqaqqinnissaq qaqugu pissappat?**

*Akissut:* Siunissami kiffartuussinermut isumaqatigiissusiassat suliarineqarnerat ukiaq manna aallartissaaq. Apeqquuteqartup ilisimariigaatut Inatsisartuni Naalakkersuisunilu ilaasortat tamaasa 6.-7. oktobarimi isumasioqatiginnissamut qaaquakka, tassanilu kiffartuussinermut isumaqatigiissutit siunissaat oqallisigissavagut.

**Apeqquut 8: Imaatigut angallassisartut nunaqavissut aamma silaannakkut angallassisartut nunaqavissut namminersortutut siuarsarnissaat siunertaralugu suliariumannittussarsiuussinissani immikkut periarfissinneqartalernissaat siunertaralugu Naalakkersuisut iliuuseqalersaarpat?**



*Akissut:* Kiffartuussinermut isumaqatigiissutit nunani tamalaani neqerooruteqartitsivigineqarput. Nuna angallavinnut assigiinngitsunut immikkoortinneqarpoq, tassanilu najukkani suliffeqarfiit suliassarpianut, imminerminnut soqutiginaatilinnut neqerooruteqarnissaat periarfissinneqarpoq. Aperisup ilisimariigaatut Air Greenland aamma Disko Line angallannermi suliassat amerlanersaanni ajugaapput – tamatumalu kingunerisaanik suliffeqarfiit nunaqavissut kiffartuussinermut isumaqatigiissutini pisussaaffiit amerlanerpaartaannik suliaqartuupput.

**Apeqquut 9: Kiffartuussinissamik isumaqatigiissummi aningaasaliissutit Naalakkersuisut aningaasanut inatsisissami siunnersuusiorumaarnissaminni qaffanneqarnissaat anguniassamaarpat?**

*Akissut:* Siusinnerusukkut oqaatigineqareersutut Inatsisartuni Naalakkersuisunilu ilaasortat 6.-7. oktobarimi isumasioqatigiisapput, tassungalu Inatsisartuni Naalakkersuisunilu ilaasortat tamaasa peqataaqullugit kaammattorpakka. Kiffartuussinernerup pitsaassusaa maannamit qaffasinnerussappat, tamanna aningaasaqarnermut sinaakkutissat annertunernik pisariaqartitsiviusaaq.

**Apeqquut 10: Disko Line-ip nunatta kujataani kiffartuussisuunera Angallannermut Naalakkersuisup atorunnaarsinniarlugu Naalakkersuisunut siunnersuuteqalersaarpa?**

*Akissut:* Naagga. Apeqquut 3-mut akissut takuuk.

Inussiarnersumik inuulluaqqusillunga

  
Simon Simonsen